

## SUMÁRIU EZEKUTIVU

Ita orgulla ho progresu di'ak sira ne'ebé alkansa ona iha área oin-oin liuhusi implementasaun Planu Dezenvolvimentu Nasionál (PDN) 2002-2020 no Planu Estratéjiku Dezenvolvimentu (PED 2011-2030). Maibé, ita konxiente katak, ita sei hasoru nafatin dezafiu oin-oin ho ekonomia dependente nafatin

ba fundu petrolíferu, ho problema ki'ak no mós dezempregu ne'ebé agrava liután tanba impaktu husi pandemia COVID-19 no inundasaun 4 Abril 2021.

Nune'e, Planu Estratéjiku Dezenvolvimentu Reajustadu ba 2023-2038 (PED-R 2023-2038) artikula objetivu boot no diresaun estratéjika sira hodi responde ba dezafiu hirak ne'e, no realiza vizaun futura katak: ***“To’o 2038, Timor-Leste ho sosiedade no sidadaun ida-idak sei moris saudável, síviku, dignu, resiliente no prósperu ho rendimentu sustentável”***.

Vizaun ida ne'e reflekte aspirasaun hato'o husi Povu liuhusi konsulta públika iha nível hotu-hotu. Opsaun ba futuru di'akliu mak dezenvolvimentu sustentável hodi konkretiza objetivus Estadu nian tuir Konstituisaun RDTL haruka. Ho Planu reajustadu ida ne'e, ita sei lori ba oin dezenvolvimentu interligadu no ekilibradu entre dimensaun sosiál, ambientál, no ekonómika, ne'ebé tanen aas relasaun 'ema, natureza no dame'. Nune'e, ita sei hala'o polítika sira ne'ebé garante balansu ho meu-ambiente atu hasees husi destruisaun ekosistema, no kria kondisaun ba ema hotu partisipa no benefisia husi prosesu dezenvolvimentu ba moris di'ak, hakmatek no dignu.

Haktuir kompromisu internasionál sira ne'ebé Timor-Leste adopta ona, dokumentu estratéjiku ida ne'e konsidera mós ajenda globál no rejionál sira ba dezenvolvimentu hodi asegura harmonizasaun metas no indikadores, inklui Ajenda Global - Objetivus Dezenvolvimentu Sustentável (ODS) husi ONU, Akordu Paris kona-ba mudansa klimátika, no konvensaun internasionál sira seluk.

PED-R 2023-2038 define medida estratéjika sira atu lori Timor-Leste ba futuru ida ne'ebé nabilan, tuir povu nia mehi atu moris ho qualidade di'akliu, livre husi kiak, hamlaha no dezigualdade, no Nasaun bele haburas babeibeik ho ekonomia ida ne'ebé sustentável no nune'e, benefisia povu tomak, ohinloron no abanbairua.

Dokumentu estratéjiku ida ne'e, nu'udar matadalan ba dezenvolvimentu ba tinan sanulu resin lima tuir mai, iha objetivu boot tolu – mellora qualidade moris, halakon kiak no hamlaha, no dezenvolve ekonomia ida ne'ebé diversifikada, inklusiva no sustentável, ne'ebé sei realiza liuhusi implementasaun medida estratéjika sira iha pilar dezenvolvimentu lima tuirmai ne'e:

## DEZENVOVIMENTU KAPITÁL UMANU NO NATURÁL

Tuir sensu 2022, populasaun totál Timor-Leste atinje ona 1,340,434 (milliaun ida, rihun atus tolu haat nulu, atus haat tolu nulu resin haat. Iha projesaun katak populasaun totál Timor-Leste bele sa'e to'o maizumenus 1.8 (milliaun ida rihun atus ualo) iha 2038, no, nune'e, número ema ho idade serbisu sei aumenta mós. Atu Timor-Leste bele benefisia husi dividendu demográfiku ida ne'e, iha urjénsia atu hasa'e investimentu, liuliu iha edukasaun, saúde, kultura no patrimóniu, ambiente, no mós iha igualdade jéneru no inkluziun sosiál, atu asegura kapitál umanu moris saudável fizikamente no psikolojikamente, ho relasaun amigável entre ema ho ema hotu no entre ema ho meu-ambiente, no iha habilidade literasia, numerasia, no habilidade sira seluk nesesária ba moris di'ak no ekonomikamente ativu iha prosesu transformasaun ekonómika no sosiál País nian.

## **EKONOMIA DIVERSIFIKADA, INKLUZIVA NO SUSTENTÁVEL**

Timor-Leste nia ekonomia depende de'it ba fundu petrolíferu, ne'ebé tuir projesaun, sei hotu iha dékada ida liu nia laran. Maski Timor-Leste pasa ona husi nasaun ho rendimentu ki'ik ba nasaun ho rendimentu médiu-ki'ik, maibé populasaun 41.8% mak moris hela iha liña pobreza nia okos, no 55.8% sofre hela pobreza iha dimensaun hotu-hotu. Ita bele de'it 'ukun-an' loloos bainhira povu tomak moris livre husi hamlaha no ki'ak, no hetan ona rendimentu no 'fontes da vida' ba sira-nia moris ho qualidade no dignu. Tanba ne'e, ba futuro, urjente tebes atu uza balansu fundu petrolíferu loloos, ho investimentu maka'as iha ekonomia verde no azul, liuliu iha agrikultura, floresta no peska, nu'udar xavi ba garante seguransa aihán, hadi'ak nutrisaun, redús pobreza, no hasa'e esportasaun no ligasaun ba indústria no setór servisu hodi kontribui ba hasa'e rendimentu Estadu nian husi área de desenvolvimentu la'ós-mina.

Aleinde ida ne'e, tenke desenvolve mós turismu no arte kriativa, no promove vibránsia ba setor privadu, kooperativa no setór públiku ekonómiku, hodi hasa'e oportunidade empregu iha rai-laran ba redusaun pobreza no alkansa kreximentu ekonómiku sustentável. Maibé sei kontinua nafatin desenvolve indústria petrolífera no mineira nu'udar fonte rendimentu bootliu hodi finansia fali esforsu sira relaciona ho hatuur ekonomia ida ne'ebé diversifikada, inklusiva, no sustentável atu aselera kreximentu ekonómiku.

## **DEZENVOLVIMENTU URBANU NO RURÁL EKILIBRADU**

Durante tinan ruanulu liubá, ita nia desenvolvimentu sentraliza de'it iha Díli maibé la'o ho maneira ne'ebé la-ordenadu no la-sustentável. Desenvolvimentu dezekilibradu iha territóriu tomak kria movimentu migratóriu boot husi área rurál sira ba sidade-kapítal, nune'e, hamosu desenvolvimentu ne'ebé la-kontroladu, estraga rekursu importante sira, no aumenta risku no vulnerabilidade ba mudansa klimátika. Ho konsiderasaun katak urbanizasaun sei kontribui ba kreximentu ekonómiku sustentável, PED 2023-1038 nia medida sira foka ba desenvolvimentu ida ne'ebé iha ekilíbriu entre sidades no áreas rurais, ne'ebé kompleta ho infraestruturas bázikas hanesan bee no saneamentu, eletrisidade no enerjia renovável. Sei iha mós facilidade nesesária sira seluk atu sidades no áreas rurais iha Timor-Leste sai nu'udar alvu ba kreximentu sósiu- ekonómiku, lori vitalidade ba iha rejiaun hotu-hotu ho vibránsia sósiu-ekonómika, ho área verde sira ne'ebé fó ksolok, estimula ekonomia rurál liuhusi desenvolvimentu urbanu-rurál ekilibradu, ne'ebé vitál ba sidadaun hotu-hotu nia moris dignu.

## **KONETIVIDADE NO VANTÁJEN KOMPARATIVA**

Desenvolvimentu infraestruturas konetividade nian hanesan estrada, ponte, portu, aeroportu no telekomunikasaun sira hasoru atrazus no la konsege konklui hotu tuir metas ne'ebé define iha PED 2011-2030. Nune'e, ba futuro, sei fó prioridade atu konklui reabilitasaun no/ka konstrusaun infraestruturas konetividade nian, liuliu hirak ne'ebé iha demanda husi indústria ne'ebé estabelese Zona Ekonómika

Espesial ba Desenvolvimentu Aseleradu (ZEEDA) sira atu bele apoia ligasaun komersiál entre rejiaun iha rai-laran no ho rai-liur. Sei fó mós prioridade atu garante manutensaun no operacionalizasaun/ fursionamentu infraestruturas sira ne'ebé konstrói tiha ona no sei konstrói, no aumenta konetividade marítima no aérea, liuliu ba nasaun boot sira, hodi bele apoia desenvolvimentu turismu no ligasaun komersiál ba kreximentu ekonómiku.

## **PÁS, JUSTISA, NO INSTITUISAUN FORTE**

Atu atinje vizaun 2038, relevante tebes konsolida prátika permanente ba boa governasaun atu Estadu Timor-Leste serve sidadaun hotu-hotu tuir lei haruka, no tuir prinsípiu universál sira tuirmai: demokrasia inkluziva, partisipativa, transparente no responsável. Ho de'it implementasaun Estadu Direitu no prinsípiu sira refere iha leten ba boa governasaun mak administrasaun públika Timor- Leste bele garante igualdade asesu ba servisus públikus, atua ho transparénsia, ho kapasidade prestasaun kontas no ho jestaun di'ak ba rekursus públikus hotu-hotu. Atu konsege rezultadu ida ne'e, presiza fortalese kapasidade institusionál ba hotu-hotu

ne'ebé hala'o servisu iha órgauns soberania Estadu no instituisaun públika sira hotu hodi rede servisu públikus bele mellora babeibeik sira-nia dezempeñu nu'udar servidór Estadu no manán konfiansa liután husi Povu. Iha nível aas liu, titulares órgauns soberania haat tenke sai modelu ba boa governasaun ba servidór Estadu sira seluk, inklui respeita prinsípiu separasaun no interpendénsia poderes, tuir artigu 69ºKonstituisaun RDTL haruka.

Nune'e, ba tinan sanulu-resin-lima (15) tuirmai, Timor-Leste sei foka ba desenvolvimentu inklusivu no sustentável ho objetivu atu konsolida progresu sira ne'ebé alkansa ona ho implementasaun PDN 2002-2020 no PED 2011-2030, no sei kontinua halo reforma sira - lejislativa no administrativa, ho ema nu'udar sentru atensaun no hamosu/promove solusaun no inovasaun lokál sira.

Lema 'mate ka moris, ukun rasik an' mak inspira ita luta hamutuk, liuhusi meius oin-oin, no ita konsege liberta duni ita-nia Pátria. Maibé, ita seidauk konsege liberta povu husi nakukun tanba razaun oin-oin. Ita hotu konxiente katak atu atinje vizaun 2038, ita sei hasoru dezafiu oin-oin, maibé ita bele alkansa.

Ida ne'e ezije atributu determinante/fatór susesu sira, inklui hasa'e produtividade liuhusi sektór makro-ekonomiku ne'ebé forte no sustentável, konsisténsia iha priorizasaun ba investimentu sira, desenvolvimentu ekilibradu iha rejiaun, no konsensu nasionál no estabilidade polítika hodi garante kontinuidade ba prosesu desenvolvimentu.

Fatór ida tan ba susesu maka tenke muda mentalidade "halo negósiu hanesan baibain" no adopta fali aproximasaun integrada no antisipatória liuhusi lei ba enkuadramentu planeamentu estratéjiku integradu no mós ba monitorizasaun no avaliasaun hodi asegura planeamentu, finansiamentu, implementasaun, monitorizasaun, no avaliasaun ho rigor ba atinjimentu vizaun 2038.

Nune'e, PED 2023-2038 sei operacionaliza ba Planu Nasionál Médiu Prazu, Planu Anuál no Grande Opsaun sira ba kada tinan. Atu garante atinjimentu impaktu no rezultadu previstu sira hanesan define ona iha PED-R 2023-2038, monitorizaun sei halao regularmente kada tinan hodi sukat atinjimentu metas liuhusi indikadór sira.

Aleinde ida ne'e, sei hala'o estudu prospetivu 'Foresight' hodi identifika sedu sinál mudansa sira hanesan pandemia, krize polítika, ka kalamidade/katástrofe naturál ruma ne'ebé bele akontese iha futuru, iha Timor-Leste ka iha mundu, bazeia ba evidénsia sientífika sira. Nune'e, bele informa atu adopta polítika públika no foti-desizaun sira hodi prevene no/ka responde no halo rekuperasaun efetiva lais liu.

Avaliasaun regulár ba PED-R 2023-2038 sei hala'o kada tinan lima. Avaliasaun ba Planu ida ne'e ninia impaktu sei hala'o depoisde tinan sanulu implementasaun hodi hatene progresu no dezafiu sira, rezultadu longu prazu no impaktu previstu sira, no nune'e, foti medida korresaun nesesária atu garante atinjimentu vizaun 2038.